

FÄUENTSCHIED

Nach eme Fäuentscheid

Hätti doch nume ...
De wär jetz nid so blöd dra
U wär mi greuiig,

Wenn i das gwüsst hätt,
de hätt i nid so entschide.
Aber das hani jo nid chönne wüsse
wie's usechunnt

Aber i has jo gwüsst,
dass es dumm cha usecho.
Wenn i denn nume
besser überleit hätt.

U wenn i besser überleit hätt,
de wär i jetz nid so dumm dra
u wär mi greuiig.
U de hätt i ds angere,
u nid dä Mischt.

U glich hätt's ou chönne dumm usecho
wenn i anders entschide hätt,
de wär i jetz vielech im angere Seich drin
u wär mi greuiig
u würd danke,
hätt i doch nume.

Am beschte, i hätt gar nid entschide,
aber de wär i gäng no dert,
u das isch doch ou nid guet,
weme stoh blibt und nid wiiter chunnt.

Weme nume hinge füre chönnt
de wär me gschider,
denn we me müesst entscheide
u würd s' richtige mache.

Aber das geit jo nid,
de wär s' Läbe
nid s' Läbe.

